



Broj: 01-50-1-54-51/05.
Sarajevo, 3. februara 2005.

ZAPISNIK

51. sjednice Predstavničkog doma
Parlamentarne skupštine Bosne i Hercegovine, održane 3. februara 2005. godine

Sjednica je počela u 10,10 sati. Prisustvovalo je 39 poslanika. Odsustvo su opravdali: Vinko Zorić, Zlatko Lagumdžija i Nenad Mišić.

Iz Vijeća ministara BiH sjednici su prisustvovali ministri Ljerka Marić i Nikola Radovanović, te zamjenik ministra Haris Bašić.

Sjednici su također prisustvovali predstavnici Državne regulatorne komisije za električnu energiju i zamjenik javnog pravobranioca Bosne i Hercegovine.

Iz međunarodnih organizacija sjednicu su pratili: predstavnici OHR-a, OSCE-a, američke ambasade, EPPU, DEI i CPCD.

Predsjedavajući Doma Šefik Džaferović obrazložio je dopunu prijedloga dnevnog reda koji su poslanici dobili u pozivu za sjednicu, a to je uvrštavanje imenovanja tri člana u Zajedničku komisiju oba doma radi postizanja sporazuma o identičnom tekstu Zakona o izmjenama i dopunama Zakona o Centralnoj banci Bosne i Hercegovine.

U raspravi o prijedlogu dnevnog reda učestvovali su: Milorad Živković i Muhamed Moranjkić.

Milorad Živković predložio je da se u dnevni red uvrsti informacija Vijeća ministara, odnosno Ministarstva odbrane o inspekciji Kasarne kod Han Pijeska. Napomenuo je da je na prošloj sjednici Doma usvojen zaključak da se informacija podnese na narednoj sjednici, te da zaključak Doma treba ispoštovati.

Muhamed Moranjkić kazao je da postoji zaključak Doma iz kojeg proizilazi obaveza da se osnuje komisija koja bi trebalo da sačini radni tekst zakona o plaćama, te predložio da se u dnevni red uvrsti osnivaanje te komisije, ili da se odgovori šta je na tome urađeno.

Povodom prijedloga Milorada Živkovića, predsjedavajući Džaferović odgovorio je da je spomenuti zaključak Doma odmah poslije 50. sjednice upućen Vijeću ministara i Ministarstvu odbrane radi izvršenja, ali da do sada nije dostavljena informacija i da je zbog toga i nema u dnevnom redu. Međutim, ako poslanik insistira na prijedlogu, Dom će se o tome izjasniti, rekao je, između ostalog, Šefik Džaferović.

U vezi s prijedlogom Muhameda Moranjkića, predsjedavajući je odgovorio da je Kolegij Doma na jutrošnjoj sjednici raspravljao o tom pitanju i da je dogovoreno da se zaključak Doma uputi Vijeću ministara, sa zahtjevom da Vijeće ministara koordinira te aktivnosti.

Zatim je predsjedavajući na glasanje dao prijedlog Milorada Živkovića za dopunu dnevnog reda.

Prijedlog je usvojen sa 17 glasova za, 16 protiv i 4 uzdržana – iz Federacije za je glasalo 10, iz RS 7.

Predsjedavajući Džaferović konstatirao je da 51. sjednica ima sljedeći

DNEVNI RED

1. Zapisnik 50. sjednice Predstavničkog doma,
2. Poslanička pitanja i odgovori,
3. Prijedlog zakona o poštama Bosne i Hercegovine (prvo čitanje),
4. Prijedlog zakona o izmjenama i dopunama Zakona o osiguranju depozita u bankama Bosne i Hercegovine (prvo čitanje),
5. Prijedlog odluke o prodaji nepokretnosti – predlagač Vijeće ministara,
6. Izvještaj Komisije za ostvarivanje ravnopravnosti spolova o posjetama kaznenopopravnim zavodima u Bosni i Hercegovini u kojima kaznu zatvora izdržavaju žene,
7. Razmatranje Izvještaja o radu Državne regulatorne komisije za električnu energiju u 2004. godini,
8. Davanje saglasnosti za ratifikaciju:
 - a) Evropske konvencije o ekstradiciji,
 - b) Konvencije Vijeća Evrope – Konvencije o pranju, traganju, privremenom oduzimanju i oduzimanju prihoda stečenog krivičnim djelima.
9. Imenovanje tri člana u Zajedničku komisiju oba doma radi postizanja sporazuma o identičnom tekstu Zakona o izmjenama i dopunama Zakona o Centralnoj banci BiH I
10. Informacija Vijeća ministara – Ministarstva odbrane o izvršenoj inspekciji kasarne kod Han -Pijeska.

Ad – 1: Zapisnik 50. sjednice Predstavničkog doma

Na Zapisnik primjedbu je dao Muhamed Moranjkić da je na 3. strani u njegovom poslaničkom pitanju pogrešno navedeno mjestu Bunja umjesto Gunja.

S ovom primjedbom Zapisnik 50. sjednice usvojen je jednoglasno.

Ad – 2: Poslanička pitanja i odgovori

Predsjedavajući Džaferović konstatirao je da su odgovore na pitanja do ove sjednice dobili: Adem Huskić, Mirsad Čeman, Momčilo Novaković i Vinko Zorić.

Odgovore na pitanja komentirali su: Adem Huskić i Momčilo Novaković.

Nova pitanja postavljena su kako slijedi:

Adem Huskić:

«Klub Stranke za BiH dobio je protest pet nevladinih organizacija iz regiona Prijedora vezan uz imenovanje Gorana Novića za direktora Direktorijata za obrazovanje kadrova Službe OSA-e. Pitam one kojima je upućen protest, a za čiji rad je nadležna PSBiH (predsjedavajući Komisije za nadzor nad radom Obavještajno-sigurnosne agencije OSA-e, direktor OSA-e, predstavnike PSBiH) šta će preduzeti u vezi s ovim pismom?»

Muhamed Moranjkić:

«Ovih dana sredstva informiranja objavila su skandalozno kadrovsko popunjavanje rukovodećih ljudi u SIPI i OSI. Pitam Vijeće ministara:

1. Koji su bili kriteriji za primanje tih kadrova i ko je o tome odlučivao?
2. Da li su tačne informacije o prošlosti (bliskoj) ovih prozvanih ljudi (kao što su Zarić, Džuvo i dr. prozvani), a koji su nedavno postavljeni na rukovodeća mjesta u ove izuzetno važne strukture i institucije BiH (kao što su SIPA i OSA), ko snosi odgovornost ako su tačne te informacije i ko će i kakve mjere po ovome preduzeti?»

Momčilo Novaković:

«Koliko na računu Urpave za indirektno oporezivanje ima sredstava prikupljenih od poreza na promet i akzica s 2.2.2005., kakva je dinamika pristizanja tih sredstava, koliko od toga pripada Republici Srpskoj i da li se pražnjenje vrši u skladu sa Zakonom?»

Jozo Križanović:

«1. Na 34. sjednici ovog doma, održanoj 32.4.2003., Dom je donio zaključak kojim je obavezao Vijeće ministara da u roku od tri mjeseca predloži zakon o restituciji. Nakon osam mjeseci ili pet mjeseci nakon tog roka saznajemo da postoji Državna komisija za restituciju. Pitanje Vijeću ministara glasi: **Koji je mandat ove državne komisije? Kada će Vijeće ministara uraditi prijedlog zakona o restituciji?**

2. Na istoj sjednici donesen je i zaključak koji je obavezao Vijeće ministara da u roku od 30 dana informira ovaj dom o do sada vraćenoj nacionaliziranoj imovini, s posebnim osvrtom na sljedeće:

- po kojoj osnovi je vraćena ta imovina,
- kojim institucijama i pojedincima,
- koja je to bila vrsta imovine.

Nakon osam mjeseci ili sedam mjeseci nakon tog roka, te informacije nema. Pitanje Vijeću ministara glasi: **Hoće li, može li i ako može, kada će Vijeće ministara informirati Predstavnički dom po ovom zaključku?»**

Filip Andrić:

"Kada će doći na dnevni red Izvještaj Istražne komisije u vezi sa zakonitošću hapšenja Ante Jelavića, Miroslava Prce i Miroslava Rupčića?"

Ad – 3: Prijedlog zakona o poštama Bosne i Hercegovine (prvo čitanje)

Predsjedavajući Doma dao je uvodne napomene u vezi sa izvještajem nadležne komisije i podnesene amandane u plenarnoj fazi.

U raspravi o Prijedlogu zakona u prvom čitanju učestvovali su: Milorad Živković, Sead Avdić, Miloš Jovanović, Izet Hadžić, Šefik Džaferović, Nikola Špirić, Momčilo Novaković, Ruža Sopta, Beriz Belkić, Seada Palavrić, Muhamed Moranjković, Mara Perkanović, Mladen Potočnik i zamjenik ministra saobraćaja i komunikacija Haris Bašić.

Sumirajući raspravu, predsjedavajući Doma konstatirao je da su Seada Palavrić i Izet Hadžić predložili da se nadležnoj komisiji, u skladu s članom 95. stav 3. Poslovnika, da novi rok od 15 dana da sačini novi izvještaj. Skrenuo je pažnju i na izlaganje zamjenika ministra, koji je rekao da je u Prijedlogu zakona napravljena tehnička greška koja je proizvela amandane, a koji su raspravu o Prijedlogu zakona odveli u pogrešnom smjeru. Zatim je predsjedavajući na glasanje dao Prijedlog da se da novi rok nadležnoj komisiji.

Prijedlog nije usvojen – za je glasalo 17, protiv 17, uzdržala su se 3 poslanika.

Kako nije usvojen prijedlog za novi izvještaj, predsjedavajući je na glasanje dao Prijedlog zakona o poštama u prvom čitanju.

Za Prijedlog zakona glasao je 21 poslanik, protiv 12, uzdržala su se 3 – iz Federacije za je glasalo 10, iz Republike Srpske 11 poslanika.

Predsjedavajući je konstatirao da je Prijedlog zakona usvojen u prvom čitanju.

Dom se izjasnio i o prijedlogu da se pređe u drugo čitanje, ali prijedlog nije dobio entitetsku većinu.

Ad – 4: Prijedlog zakona o izmjenama i dopunama Zakona o osiguranju depozita u bankama Bosne i Hercegovine (prvo čitanje)

Predsjedavajući Doma dao je uvodne napomene, u kojima je, pored ostalog, rekao da je nadležna komisija Prijedlog zakona podržala u predloženom tekstu, te da je Beriz Belkić podnio jedan amandman koji želi braniti u plenarnoj fazi.

O Prijedlogu zakona u prvom čitanju nije bilo rasprave, pa je usvojen jednoglasno.

Sa 30 glasova za i jednim uzdržanim usvojen je i prijedlog Kolegija da se Prijedlog zakona razmatra u drugom čitanju.

Ni u drugom čitanju nije bilo rasprave, pa je predsjedavajući na glasanje dao amandman Beriza Belkića. Za amandman glasao je 21 poslanik, protiv su glasala 4, uzdržalo se 5. Po entitetima, iz Federacije za je glasalo 20, iz Republike Srpske jedan poslanik. Kako nije bilo entitetske većine, izvršeno je usaglašavanje u Komisiji Kolegija. Pošto nije bilo saglasnosti, obavljen je drugi krug glasanja, kojom prilikom je protiv amandmana iz Republike Srpske glasalo 8 poslanika, što nije 2/3.

Predsjedavajući Džaferović konstatirao je da je amandman Beriza Belkića usvojen i da postaje sastavnim dijelom Prijedloga zakona. Zatim je na glasanje dao Prijedlog zakona u drugom čitanju.

Sa 33 glasa za i jednim uzdržanim (iz Federacije za 22, iz Republike Srpske 11) usvojen je Zakon o izmjenama i dopunama Zakona o osiguranju depozita u bankama Bosne i Hercegovine.

Ad – 5: Prijedlog odluke o prodaji nepokretnosti – predlagač Vijeće ministara

O Prijedlogu odluke vođena je duža rasprava u kojoj su učestvovali: Nikola Špirić, Mladen Potočnik, Beriz Belkić, Adem Huskić, Selim Bešlić, Fatima Leho, Seada Palavrić, Filip Andrić, Ivo Miro Jović, Petar Kunić, Ljiljana Milićević, Nijaz Duraković, Tihomir Gligorić i Jozo Križanović. Na pitanja u vezi s pravnim statusom predmetnih nekretnina odgovorila je Dragica Miletić, zamjenik Javnog pravobranioca BiH, a zatim je, u ime predlagača, kratko govorila ministrica Ljerka Marić.

Nakon rasprave, predsjedavajući je, na zahtjev Kluba Stranke za BiH, dao pauzu, nakon koje je Beriz Belkić rekao da je pauzu tražio kako bi Klub formulirao zaključak koji želi predložiti Domu da usvoji uz Odluku.

Predsjedavajući Džaferović pročitao je sadržaj predloženog zaključka, koji glasi:

1. Obavezuje se Vijeće ministara BiH da sredstva dobivena prodajom ovog zemljišta usmjeri Univerzitetu u Sarajevu, u skladu s postojećim Master planom i Regulacionim planom kampusa; i

2. Da se pravo korištenja na ostatak zemljišta u kampusu zadrži na Univerzitetu u Sarajevu.

Predsjedavajući je, zatim, prvo na glasanje dao Prijedlog odluke o prodaji nepokretnosti.

Za Prijedlog odluke glasalo je 38 (iz Federacije 25, iz RS 13), jedan poslanik je bio uzdržan.

Predsjedavajući je konstatirao da je Dom usvojio Odluku o prodaji nepokretnosti u predloženom tekstu.

Zatim je predsjedavajući dao na glasanje Prijedlog zaključka koji je dao Klub Stranke za BiH.

Za predloženi zaključak glasalo je 14, protiv 15, uzdržalo se 10 poslanika.

Prema tome, Prijedlog zaključka nije usvojen.

Ad – 6: Izvještaj Komisije za ostvarivanje ravnopravnosti spolova o posjetama kaznenopopravnim zavodima u Bosni i Hercegovini u kojima kaznu zatvora izdržavaju žene

U raspravi povodom Izvještaja učestvovala su: Dušanka Majkić, Mubera Ušanović i Ljiljana Milićević.

Kako je u raspravi izneseno niz prijedloga novih zaključaka, predsjedavajući je predložio da Dom zaključkom zaduži Komisiju da sumira sve nove prijedloge i da Domu, eventualno, dostavi dopunjeni izvještaj.

Ovaj prijedlog predsjedavajućeg usvojen je s 32 glasa za i jednim protiv.

Ad – 7: Razmatranje Izvještaja o radu Državne regulatorne komisije za električnu energiju u 2004. godini

U okviru ove tačke vođena je duža rasprava u kojoj su učestvovali: Milorad Živković, Beriz Belkić, Sead Avdić, Jozo Križanović, Ruža Sopta, Ljiljana Milićević, te predsjedavajući Državne komisije za električnu energiju Mirsad Salkić i sekretar Doma Branka Todorović.

Nakon rasprave, Dom je, na prijedlog Milorada Živkovića, usvojio sljedeći

Z A K L J U Č A K

Zadužuje se Državna regulatorna komisija za električnu energiju da do kraja marta 2005. dostavi dopunjeni izvještaj o radu u 2004., u skladu s raspravom i pitanjima poslanika postavljenim u raspravi na 51. sjednici Doma.

Za ovaj zaključak glasalo je 19, protiv 16 (iz Federacije 11, iz RS 8), uzdržao se jedan poslanik.

Ad – 8: Davanje saglasnosti za ratifikaciju:

- a) Evropske konvencije o ekstradiciji,
- b) Konvencije Vijeća Evrope – Konvencije o pranju, traganju, privremenom oduzimanju i oduzimanju prihoda stečenog krivičnim djelima.

Dom je bez rasprave dao saglasnost za ratifikaciju konvencija iz ove tačke.

Ad – 9: Imenovanje tri člana u Zajedničku komisiju oba doma radi postizanja sporazuma o identičnom tekstu Zakona o izmjenama i dopunama Zakona o Centralnoj banci BiH

U Zajedničku komisiju imenovani su: Fatima Leho, Nikola Špirić i Ruža Sopta.

Ad – 10: Informacija Vijeća ministara – Ministarstva odbrane o izvršenoj inspekciji kasarne kod Han-Pijeska.

Predsjedavajući Džaferović konstatirao je da za ovu tačku nije stigla pisana informacija, ali da je sjednici prisutan ministar odbrane Nikola Radovanović, pa je predložio da ministar informira Dom dokle se stiglo u izradi informacije, budući da se Dom opredijelio da dobije pisanu informaciju, da to onda Dom primi k znanju, a da pisanu informaciju, onda kad je dobijemo, razmatramo na Domu.

Ministar Radovanović podnio je Domu usmenu informaciju. Pored ostalog, rekao je da je, na osnovu pisma Visokog predstavnika od 16. decembra 2004. godine, otvorena istraga u vezi s kasarnom u Han-Pijesku i da su obavljene ukupno dvije istrage o sistemskim slabostima u Oružanim snagama, te da je 14.2.2005. godine rok za dostavljanje ukupnog izvještaja Visokom predstavniku. Ukupna istraga još je u toku i namjera je Ministarstva odbrane da je okonča u ovom roku i da po okončanju ukupne istrage Predstavničkom domu dostavi informaciju u pisanom obliku, rekao je, između ostalog, ministar Radovanović.

Ministar Radovanović iznio je i određene pojedinosti vezane za predmetno pitanje, imajući u vidu, kako je rekao, značaj teme, činjenicu da je ona na dnevnom redu i uvažavajući poziciju poslanika.

Nakon izlaganja ministra Radovanovića, predsjedavajući Doma Šefik Džaferović zahvalio je na informaciji. Konstatirao je da Dom informaciju prima k znanju, napominjući da postoji zaključak Doma i da misli da ne bi trebalo otvarati raspravu, već će se o Informaciji raspravljati kada stigne i bude stavljena na dnevni red.

Za riječ se, ipak, javio Milorad Živković. On je zahvalio ministru odbrane što je došao na sjednicu i Dom informirao o predmetnom pitanju. Naglasio je da je tražio ovu tačku zato što su bile oprečne informacije od strane Visokog predstavnika i ljudi koji su izvršili istragu u Kasarni Han-Pijesak. Rekao je da misli da ne bi imali ovu situaciju da je bila bolja komunikacija između Vijeća ministara i Parlamentarne skupštine, tj. da je Parlamentarna skupština obaviještena da je 14. 2. rok za dostavljanje informacije.

Ovim je završena 10. tačka dnevnog reda.

Predsjedavajući Doma zaključio je time i 51. sjednicu Doma, uz obavještenje poslanicima da će se 52. sjednica održati između 15. i 19. februara 2005. godine.

Sjednica je završena u 14,35 sati.

Sastavni dio Zapisnika je transkript 51. sjednice Predstavničkog doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Šefik Džaferović